

INKURU Y'INKORAMUTIMA



# IMBERE

YO KUGENDA

Duc Authentique

# IMBERE *ya* KUGENDA

Duc Authentique

© Copyright 2021— Duke Stories

Uburenganzira bwose burabitswe. Ntivyemerewe kugira kopi, gusohora canke gukoresha ukwarikwo kwose mu ntumbero yariyo yose iyi nkuru utabiherewe uruhusha n’umwanditsi nyeneyo ubwiwe.

Iyi nkuru irora ukuri kw’ubuzima bwa misi yose, ikaba yanditswe mu buryo bwo kwinezeroza igamije kwigisha, guhanura no gukebura ikibano n’abantu muri rusangi.

Iyi nkuru hamwe n’izindi nkuru zose zanditswe n’umwanditsi Duc Authentique, urashobora kuzironka zose vyoroshe kuri page y’inkuru yitwa “**Duke**” ku rubuga hwaniro Facebook.

Edited by Munezero Prince

Cover design: Munezero Prince

Facebook: **Duke Stories**

Whatsapp: (+257) 71349267

Ebook published by Duke Stories®

Bujumbura, Burundi

**Izindi Nkuru za Duc**

AMAHIRWE MAKE  
UMUSODA  
THE BETRAYAL  
STORY OF MIKE  
KURE Y'UMUTIMA  
RUGIRA IMBARAGA  
UBWENGE

# 1

Iyo nitegereje ukuntu atakintu hano kwisi gihoraho, buri kimwe cose kigira iherezo, caba ciza caba kibi, nsanga vyose ari ubusa nkaca nibaza nti none impamvu ya vyose n'iki? Ni Imana? Mbega ni igiki conyemeza ko ar'Imana nzi bayimbwira gusa kandi n'abayivuga hari ibibazo biyerekeye badatorera inyishu? Kuki ubona uvyuka unezerewe bukira ubabaye canke igihushane?

Kuki utigera umenya ibigira bikurikire gushika ubibonye maze rimwe na rimwe bikaza bihushanye nivywo wari witeze maze ahari ivyizigiro ntihashigaye ukugaragara gusa ariko hagasigara ukwicuza icatumye witega?

Jewe nakuze nanka ubuzima kuko bumeze nkinzira ugenda utazi amaherezo kandi ugategerezwa kugenda vyanka vyakunda. S'uko nari ngowe kurusha bose ariko nari nshavuriye ubwenge bwanje budatahura impamvu yo kubaho nkisanga mfise amaso araba ariko ntabone kuko ivyo nashaka sivyo nabona, nkagira amatwi yumviriza ariko ntiyumve nasanze musu yijuru atagishasha vyose vyama arivyabindi. Vyabindi vya misi yose biruhira kurambira ariko nanje nkabura inguvu zo kubihagarika kuko vyansaba kwishirira akaburungu ku buzima bisigura kwiyahura.

Mu muryango wabana batatu nari umuhererezi, nkaba umwana atandukanye n'abandi bose, sinigera mvuga sinigera ntwenga, ivyo ntakibazo vyari biteye kuko bari bazi ko ariko meze. Ariko muri jewe hari ibibazo vyinshi cane cane ibijanye n'impamvu ya vyose hama kubiburira inyishu bikantera gushavurira ubuzima. Sinzi impamvu arije jenyene vyashavuzza bigatuma nanka no kubaho mugihe abandi bose nabona ataco bibabwiye bibereyeho batwenga ariko jewe nabafata nk'ibijuzi bitwenga ivyo bitazi.

Ntamugenzi n'umwe nari mfise ntan'uwo nari numva nshaka kuko n'ukuntinya barantinya abantu bose ndetse benshi banavugaga ko budatonze nkabihoza. Ikintu conyene nakunda kwari ukwiga kuko nama nigana icizere c'uko umusi umwe nzoronkera inyishu mu vyigwa nzogenda ndiga mw'ishure ariko nasanga buri bumenyi naronka bwantera kwibaza ibindi bibazo vyinshi.

Nari nciye ubwenge mu bijanye n'ukwiga kuko kuva ntanguye amashure sinigeze ntakaza ikibanza cambere ndetse hari n'aho wasanga uwunkurikiye n'ukuvugaga uwa kabiri ndamurusha amanita menshi cane. Nibaza ko ari naco kintu conyene catuma nemerwa mu kibano ndetse no mu muryango kuko ibindi vyose vyahushana n'ivyo uwariwe wese yokwitega ku muntu muzima.

Nahejeje amashure yisumbuye mu kibazo ca leta ntahana amanota menshi kuburyo nabaye uwa mbere mu gihugu, aho nagiye kumenyeshwa ko naronse uburenganzira bwo kuzoja kubandanyiriza amashure mu Burusiya.

Ntaco vyahinduye ku buryo niyumva ariko vyabaye ngombwa ko ntangura kurondera ivyangombwa vy'inzira n'ibindi bijanye navyo.

Mw'iyi misi niho umusi umwe nari ntashe ku mugoroba, ahantu mu nzira nacamwo hari urupangu nageze ku mwango hari hicaye umukobwa ntityeho kuraba ariko ndamurenganye nagiye numva ampamagara mw'izina ati: "Igor"

Ntangaye nca ndahindikira ndamuravye mu maso mbona sindamuzi aca ambaza ati: "Ntaco utaye?"

Jewe mbanza kwikora mu mufuko mbona ingodo yanje irimwo ibintu vyose ndetse no mw'isakoshi ibintu vyose birakwiye nca nibwira ko yoba ariko arankinisha kuko yaguma atwenga nca nditahira ataco ndamuvugishije.

Ku musu ukurikiye, nasubiye kuhaca nsubira kuhamusanga naho nyene ambwira kwa kundi, hoho siniriwe ndabiha agaciro kuko imisi nabandanije kuhaca nama ndahamusanga akambwira kwa kundi nyene antwengera nanje nkamwirengagiza. Ariko umusi umwe narahaciye nsanga siho ari, numva biratangaje ukuntu, nca ndahagarara nitegereza hamwe akunda kwicara, ndavye neza mbona hariho agakaye gatoya, nca ndegera ngomba ndagatore, nza numva umuntu avugiyeye inyuma yanje ngo:

"Hahahaha nari ndabizi ko unkumbura."

Nca ndahindukira mbona ni wa mukobwa, aca asubira kumbaza ati: "Igor har'icutaye?"

Numvise nshavuye ntazi ikinshavuje, n'ubundi nari nsanzwe nama nshavuye, nca ndagenda ataco mvuze, ngeze imbere nagiye numva ikintu kivuze inyuma yanje nk'ikiguye, nca ndahindukira nza mbona ni wa mukobwa aryamye hasi, nibaza ko ariya mikino yiwe ndabandanya ariko ngeze imbere, ndahindukira kandi mbona hamwe aryamye hasi abantu barashengereye, nca ndasubirayo kuraba ico yabaye.

Nasubiye inyuma, nca hagati yigugu ry'abantu, hama ndamuserukako mbona arambaraye hasi adakakaza, ndamwitegereza muburyo ntari niteze, numva ndamugiriye impuhwe nca ndapfukama ndamukora ku mutima, numva uracatera ariko ngerageje kumukangura vyanka ko akanguka. Nkimwiseguje kugikiriza, haje taxi, sinamenye uwayihamagaye, ndamuterura ndamushira mu modoka, naje ndurira tuca turajana ngenda ndamwiseguje.

Mu bintu nakunda kwari ukwitegereza kurusha kuvuga. Kwitegereza kubera kw'atawe nakenera atari amaso yanje, nkanka kuvuga kubera ko vyansaba ko nkenere uwo kuvugana nawe mugihe bitari ibintu vyanje kuvugisha abantu. Naramwitegereje ndamwegereye ku buryo nabona buri kantu kamugize, nkaraba imishatsi yiwe yari irende rirerire isanzaraye, uruhanga rwiwe n'inkombe yarafise, ingohe ziwe zagomba guhura, amaso yiwe yarahumirije, izuru rito, umunwa usanzwe, agasakanwa n'udutama, natangajwe n'ukuntu vyansamaje kuko naciye numva shoferi ambwira ko twashitse ku bitaro.



Bazanye inderuzo y'abanganga bamushirako, bamwihutana indani nanje mpereza amahera taximan, ndakurikira gushika mu cumba bamwinjijemwo ariko ninjiye baca baransohora nca nicara ku gasima kari muri coridoro nitega ibikurikira. Haheze akanya, nza mbona umugangakazi araje ashika a...

## 2

Mugangakazi yaraje ashika ambaza ati: "Ni wewe wazanye urya mukobwa ahejeje gushika?"

"Ego"

"Dukeneye ibimuranga vyiwe."

Jewe numvise mbuze ico nishura, nca mfa kuvuga nti: "Yitwa Akimana Allegra, ni mushikanje."

Aca yongera ambaza ati: "Afise imyaka ingahe?"

Nanje nti: "18"

Yakomeje kuntera ibibazo, ambaza aho tuba, abavyeyi bacu, vyose ndamubwira, ariko amaze kugenda, niyumvira igituma nabeshe ndakibura ariko kandi nibwira ko bitari kuba bibereye ko mvuga ko ntamuzi.

Haheze akanya, haje uwundi mudamu akuze w'umuganga ansanga ahondi aca arambwira ngo ndamukurikire, numva umutima urasimvye ariko ndamukurikira, tuca twinjira mu cumba aho hasa no mubiro, ampa ikaze ndicara hama akura amarori yari yambaye, aca arambaza ati:

"Witwa gute ga musore?"

"Igor"

"Sinzi igituma wabeshe ariko nizera ko ufise impamvu yumvikana...ntiyitwa Allegra yitwa Aria ndamuzi kuko s'iryambere aje kuribi bitaro kuva akiri muto bama bamutuzanira nibaza ko utamuzi?"

"Ntawe nzi, namuciyeko ntashe aho yaciye agwa mbona, nca ndamuzana"

"Wagize neza, ariko n'ubundi nico kimwe vyose. Aria arwaye ingwara yo gukama amaraso, akivuka ntawarazi ko azorena imyaka itanu kuko iruhande yo kugwaragurika, mama wiwe yitavye Imana amusiga afise imyaka ibiri, se wiwe ubuzima ntibwamworoheye, akora izamu ariko yaranse kumutanga ngo bamumurerere. Yavuze ko nimba azopfa akeneye kuzomuraba apfa kuko amukunda cane, sinzi igituma ngobewe kubikubwira ariko numvise nobikubwira. Rero genda umurabe ubu ndazi ari mu gukanguka kuko twamuteye amaraso"

Naramushimiye nca ndahaguruka ndagenda, ngeze mu muryango nca ndahindukira nti: "Muravye, mubona Allegra... bambe Aria afise igihe kingana gute?"

Ntaranaheza kuvuga, yanciriyemwo ati: "Gito cane kidashika ukwezi tugereranije dufatiye kunyishu z'ibipimo twamugiriye."

Narasohotse, ninjira muri ca cumba yar'arimwo nca nsanga aracasinziye, nca nicara ku gitanda iruhande yiwe nguma ndamwitegereza, ntangura kwibaza nti: "Ubuzima ni iki koko?" Nza numva aratwenze cane areguka nanje ndakanguka, aca avuga ati: "Ubuzima buratandukanye no kubaho, hari abariho batariho kuko kubaraba gusa birahagije, biramaze kugira umenye ko atabuzima bafise."

Ca ndamubaza buno nyene nti: "Ushatse kuvugiki?"

Nawe asubira gutwenga cane ati: "Ikibazo ahubwo n'ukwibaza wewe ubwawe woba uri mu bariho gusa canke abafise ubuzima?"

Jewe nagumye mpoze ndamuraba, aca yongera avuga ati: "Mfise ubwoba ko inyishu nohava ndaguha itokuryohera, nizere ko utari ikijuju cane kugira utahure ico nshatse kuvuga kuko ndazi ko ubwenge bwo atari ikirenga..."

Nakomeje kumuraba ataco mvuga, ariko numva nomubwira ko kuva ngitunguye amashure atamuntu yari bwubahuke kuvuga ko ntagira ubwenge, ndetse n'abigisha banyigisha. N'ikimenyamenya, nari nimirije kuja mu Burusiya kubandanyirizayo amashure, nari numva nomubwira nti: "Iyaba womenya sha!"

Ariko yasubiye kubandanya avuga ati: "Ukubura ubwenge kwawe kwambere ni ukuba uriko wibaza ko kuba wahoze uba uwambere mu mashure wacyemwo yose ari bwo bwenge hahaha urambabaje nukuri."

Nagira ndamubaze nti: "Ubwenge ni iki kuri wewe?"

Ariko kandi yabandanije avuga ati: "Ndazi uriko wibaza uti ubwenge ni iki?"

Arabandanya atwenga aca agerekako ati: "Ni vyiza cane kuba wibajije ico kibazo, kandi ugatahura ko atanyishu ugifitiye ni ikimenyamenya ca mbere ko atabwenge ufise Hahaha"

Nari ntunguye kwumva ntagishoboye kwihanganira kuba ndiko ndasugugurwa n'agakobwa nari mbonye vuba kakanyabibazo gusa, ariko nibuka ko imisi gasigaje iharuye nca ndakubahira ico.

Kabandaniye kavuga ngo: "Ijambo ry'Imana rivuga ngo kwubaha Imana niryo tanguriro ry'ubwenge, ikibazo woca wibaza uti, Imana ni iki canke irihe? Imana nimba iri umuremyi wacu natwe turi ibiremwa vyayo, kandi imero y'umuremyi uyibonera muco yaremye. Iyo icaremwe kiriko kirabaho, kiba kiriko gishitsa impamvu caremewe. Rero kwubaha Imana kwamwere ni ukubaho. Ubwenge rero ni kubaho uriho, apana kubaho nk'ikiziga hahahaha... Icirwa cacu c'uno musi kigarukiye a-ha. Ndazi uranshimiye n'ubwo utabivuze rero urakoze gushima." Aca aramwenyura.

Yaciye ahaguruka arasohoka nanje nca ndamukurikira ataco mvuze ariko ntangaye gose, meze nk'umuntu ahejeje gukubitwa n'inkuba. Twarasohotse ibitaro, tugeze kw'ibarabara nca ndamuhamagara nti: "Aria"

Nawe ati: "Sabwe Patiri wanje. Wambatije Allegra, kwanza kuberiki utarimpamagaye? Rega AriaAllegra risona neza ni iry'ururunganwe kabisa sico kimwe na Igor Hahaha oh, mbabarira mvuga amajambo menshi mbwira ico wagomba umbwire."

Jewe naza nibagiye n'ico nagira ndamubaze. Nkiriko ndiyumvira nagiye mbona...

### 3

Nagiye mbona umugabo mutomuto aje ariruka yabize icuya cinshi, yambaye n'impuzu z'ishirahamwe ry'ikizamu amushikiye ashika ahobera Aria, nca ngirako ntahura ko ari se wiwe nkuko wa mugangakazi yari yabimbwiye. Akimuhobereye aca amubira ati: "Mwananje umbabarire kubona ntahabaye ngo ndagutabarize."

"Ntiwambwiye ko navukiye kubaho kandi ko umumalayika murinzi wanjye anguma hafi buri segonda?"

Se yarahindukiye arandaba cane, Aria aca abandanya amubwira ati: "Uyo ntumwibazeko vyinshi, yitwa Patiri nako Igor niwe yamperekeje kwa muganga."

Se wiwe yarandamukije aranshimira gose, hama baca bafatana ku rutugu baragenda, nsigara mpagaze aho haheze akanya nca nanje ndatambuka ndataha bukebuke ubwenge bugenda burasubiramwo buri kamwe kose kari kambayeko uwo musi kuva mpuye na Aria. Ico novuga co n'uho nari numva ntari muri jewe wa nyawe, ahubwo numva umenga haragahaze.

Ijoro ryari ryijimye, amatara y'impangu yo ku mabarabara ariyo amurikira abahita, na jewe ndimwo ntambuka buhorobuhoro, nihweza buri kamwe kanca mu maso, nkaraba abantu batandukanye, twahura nabo nkibwira nti: "Aha buri wese afise ibibazo vyawe, buri wese afise indoto zawe, buri wese afise amerekezo yawe, ndetse buri wese afise iherezo ryawe, ubuzima ni urugendo rurerure kuri bamwe, rukaba rugufi ku bandi nka Aria..."

Nibutse Aria nsubira kwibaza nti: "Ni umuntu ki? Ni agasigo? Ni akadayimoni? Ni akavajuru? Kuki atandukanye n'abandi? Kuki avuga amajambo ntamenyeye kwumva?"

Nashitse muhira, ntora mu mufuko urufunguruzo rw'urupangu nabamwo bari barampaye nagendana nkashika niyugururira, ndugurura ndinjira mu rupangu, itara ryo muri salon ryari ryakije, nuko bisanzwe Maman yari akiri muri salon kuko ntiyigera aryama hakiri umwe mu bana akiri hanze.

Naramuramukije nti: "Bonsoir Maman!"

Aca arazanzamuka ava mw'itiro aho yari yasinziriye mu ntebe muri salon. Abonye kwari jewe, aca ariruhutsa ku mutima ati: "Ahwiii!" Aca agirako ambaza ati: "Kuberiki utitavye téléphone Igor? Uzi ko nari nahangayitse nibaza ko haricakubayeko?"

Naravye téléphone, nsangamwo appel cumi na zitanu za Maman na mukuru wanje, nca nibuka ko nigeze gushira téléphone muri silencieux ngomba ninjire mubiro bimwe nkuko vyari vyanditswe ku muryango, nca ndabimusigurira mu majambo make yanje, ariko uwo musu kuburyo budasanzwe numvise nomubaza, nca ndamubaza nti: "Kuberiki none wampangayikiye?"

Aca arahaguruka ashavuye naje ndabibona, aragenda ageze ku muryango waja muri corridor, aca ambwira ati: "Wibuke gusiga uzimije amatara kuko Papa ntataha yagiye muri mission."

Narinjiye mu cumba ndadepoza agasakoshi nari mfise, nca ndagenda muri douche, mvuyeyo nca ndaja ku meza ndafungura bikeyi kuko nari numva atakayabagu mfise, nca ndagenda mu cumba ariko sinashotse nryama, nabanje ntora igitabo nari maze imisi ndiko ndasoma ca Myles Munroe citwa, *"L'homme Sa mission Son pouvoir"* Ariko naco nyene numvise kindambiye nca ntora agacarnet kanje nakunda kwandikamwo gahunda zanje n'utuntu n'utundi twaba twambayeko, na cane cane ibibazo vyinshi naba nibajije kur'uwo musu. Ikibazo kimwe caguma kingaruka mu mutwe nanditsewo cari, "Aria ni umuntu ki?"

Nararyamye burinda buca ntanarose, hama mvuyuka amasaha yitereye, mbona ko ataho noba nkigiye ayo masaha, nca mpitamwo gukora isuku mu cumba canje nongera ndamesa.

Ku mugoroba natoye agatabure nja kwicara kw'irembo nsamarira abahita, nkomeza kwitegereza no kuguma niyumvira cane kuko nibaza ko arico cari ukuntu canje. Sinzi ukuntu nagiye mbona agakinga kaje, gashika gafatira ifure imbere yanje, ndakanguka cane kuko nari natakariye mu vyiyumviro vyanje, nza numva ijwi ry'umukobwa atwenze cane, nunamuye amaso mbona ni Aria. Numvise mbabayeye kandi ndanashavuye nti: "Ariko vrema ntasoni? Aho ntubona k'uri mu kutimenya? Wewe urazi k'ugwaye ariko ndabira uriko unyonga ikinga mw'ibarabara ricamwo imiduga myinshi nk'uku? We ntubona kushaka gutera ingorane? Kuki udashobora kwifata nk'umuntu



akuze ngo umenye ikibereye n'ikiruta ikindi? Rega nimba utikunda canke warihebuye ushaka kuba icihebe. Iyumvire kungaruka zoshobora kuba habaye isanganya? Umwana yoba Impfuyi, uwubatse yoba umupfakazi, umuvyeyi akabura umwana,... kubera iki? Kubera ukutimenya kwawe n'ukwijajara kwawe..."

Nasanze nakaze, mvuga n'amajambo menshi ntazi impamvu, ku buryo na Aria yaciye yunama araba hasi nza numva avuze mw'ijwi rito ati: "Basi mbabarira sinzosubira."

"Ntavyo kukubabarira ngaho ahubwo vako iryo kinga turisubize iyo urikuye."

Yavuye kw'ikinga, hama ndarifata ngenda ndarisunika, nawe arankurikira aca mbwira ati:

"Mbabarira basi ndaguha icigwa ca kabiri."

"Icigwa umpa wewe? Manza ucihe kuko nawe uragikeneye"

"Urabizi neza ko ataco noguha?"

"Oya wewe wanshavuje."

Nawe aca aratwenga ati: "Igor reka kwibeshera burya hari ikindi kintu uzi atari gushavura? Ntiwigire nk'aho nagushavuje kuko usanzwe ushavuye karemano."

"Nivyo urantsinze ahubwo we watumye ndonka uwo ndaritako ariko ntibikuraho ko utari mu makosa."

"Ego basi ndemeye."

"Oya nta ego basi ndemeye, vuga uti ndemeye ko ndi mu makosa."

"Ndavyemeye."

Twabandanije tugenda atawuvugisha uwundi, nza numva aratwenze kandi ati: "Ukuntu navuze ndavyemeye rero wamengo turi mw'isengero imbere ya patiri turiko turaragana." Ntivyantwengeje ahubwo naciye ndamubaza nti: "Kuberiki umeze uko?"

Nawe ati: "Ukwahe?"

Twari twashitse kuri rwa rupangu nkunda kumucako yicayeko, tuca turinjira, ntanganzwa n'inzu nziza yarimwo ariko twayiciye iruhande, aca mbwira ati: "Ikinga yisige aho uze ico ndakwereka." Nca ndayegamika ku ruhome tuca turagenda, duseruka ahantu nza mbona...

## 4

Twaragiye nza mbona duserukiye ku kazu kari hirya k'icumba kimwe, dushika twinjiramwo, ntabintu vyinshi vyari birimwo uretse igitanda kigerekeraniye kabiri, gifise aho kuryama musu n'aho kuryama hejuru. Ibitanda be n'ivyo nabiheruka muri Internat, aca ambwira ati:

"Karibu aha niho mu bwami bwa twe na Papa. Jewe kubera nkaze ndara hejuru nyene nkaca mba umwamikazi w'ibirere hahaha, Papa nawe kubera ariwe mumarayika murinzi wanjye arara musu yanje akancungera."

Jewe nakomeje kwitegereza ku ruhome hari hariho ibicapo vyinshi vy'abantu, aho nabonamwo Papa wiwe nkabona n'ibicapo vy'umudamu nca ndamubaza nti:

"Uyu ni Maman wawe?"

"Ego"

"Wamucafye gute utamubona?"

"Namurabiye kw'ifoto, umusi namucapa nari mfise imyaka 8."

Ntangaye, nca ndamubwira nti:"Kumbe ufise ingabirano nyinshi..."

"Cane ivyigwa nzoguha ni vyinshi urahiriwe ko twamenyanye hahahahaha"

Nakomeje kwitegereza ibicapo ariko ngize gutya, nabonye agacapo gatoyi mu mfuruka, ndavye mbona umuntu ariko asa najewe nca ndamubaza nti: "Uyu ninde?"

Mu kajwi karimwo agatwengo kiyoroheje ati: "Ni Patiri"

Nca ndamubaza nti: "None jewe unzi kuva ryari?"

"Kuva nkica ubwenge namye ndakubona urengana ukwo nyene"

"Kuberiki jewe?"

"Gute kuberiki wewe?"

"Kubera ndazi wabonye benshi uhura na benshi"

"Kubera nabonye ari wewe nkwiye guha ivyigwa vyanje imbere yuko ngenda..."

Yambwiye ukwo, nca ndibuka ko mugangakazi yambwiye ko asigaje igihe kidakwira n'ukwezi mu gihe je nari nsigaje indwi zitatu nkagenda kwiga mu Burusiya nca ndamubwira nti: "Canke usange nije nzoguha ivyigwa vyanje imbere yo kugenda"

Nawe aca aratwenga ati: "Vy'ishavu?"

Nca ndamwihoza, nca ndasohoka ariko yaciye amfata ukuboko aca ambwira ati: "Imbere yuko ugenda ndagusabe ikintu kimwe?"

Nca ndahindukira nti: "Iki?"

"Kuncuro yambere twenga ndagusavye"

"Ego mu ndoto zawe ndaza gutwenga"

Nca ndamwiyaka nditahira.

Aria niwe muntu wambere twari dushoboye kuba twovugana ataco duhuriyeko, sinzi impamvu nari numva umenga mu buryo ntazi hari ikintu cagomba kudukubona uretse ko

nari ndabizi ko imisi asigaje iharuye sinashaka kuvyiyumvirako cane.

Uwo musu naryamye kare kuko nashaka kuzinduka nja kubandanya ndondera ibintu bimwe nzokenera mu rugendo. Ku musu ukurikira, nasubiye gushika muhira mw'ijoro, nsanga mukuru wanjye ariko araba ifilm, ndamucako ndibandanyiriza nshika ngarama mu gitanda ndiruhutsa nti: "Njanyeye uno musu rirarenze Aria atamenye umutwe"

Nkiriko ndivugana, mukuru wanjye yansanze mu cumba aca anterera igipapuro kizinze ati: "Cazanyeye agakobwa kitwa Allegra k'inzobe gafise inkombe ukuntu kaje ku gakinga"

Numvise njingiswe kuko nari nzi ko nagakize uwo musu, none kaje kandi nongeraga nsubira kubabazwa n'uko kasubiye kunyonga ikingira kandi karwaye. Natoye icyo gipapuro nsangako igicapo cy'umuntu agomba gusa na jewe uretse ko wewe yariko aratwanga musu handitseko amajamba avuga ngo:

*"Nikanguye, mpumura amaso, ndihindukiza nyiganza ingingo zanjye zose, numva ko meze neza atakibazo, ndakiramuka ndicara, ukuboko kwanjye kwiterera ku meza, intoke zimpatira gufata ikaramu n'urupapuro, ngoberwa kugucapa, ubwenge buhigira hasi hejuru ishusho yawe buyinzana mu maso, ndakubona wijiriwe usa n'isoko ryakamye, ibibabi n'ibiti vyari bigukikuje biruma biraherengetera, ahahora isoko ryo gutotahara hasigara ubugaragwa, ukwo nteye sinkunda gutekereza no kwirengagiza ataco nkoze. Nagerageje*

*guhindura igicapo ubwenge bwanzaniye ariko mpinduramwo icipfuzo c'umutima wanje kukubona utwenga, kukubona wuzuye ubuzima, basi ni ntabibona mu kuri imbere yo kugenda, ndabibone mu vyiyumviro vyanje, kandi umbabarire nasubiye kunyonga ikinga ariko kandi sinari kuryama ngo ngoheke ntaguhaye icigwa ca kabiri. Ni AriaAllegra"*

Buri jambo nasoma ryari rimeze nk'inkota ikarishe insogota intobekerenya kuko numvise umenga ndiko ndashonga mpera niyumva.

Aria, iruhande yo kumenya gucapa adahusha, yavuga amajambo aremeye ku buryo iruhande yo kumutinya no kumugirako amakenga menshi, yari amaze gufata igice kitari gito c'ivyiyumviro vyanje. Nisanga ikintu kimwe kimwerekeye ntashaka kwiyumvirako kwari uko himiriye gushika igihe dutandukane sinzosubire kumubona nca ndibwira nti: "N'ubundi Aria asigaje igihe gito kugira agende aho atamahirwe n'amwe yo kumubona, kumwumva, kumukabakaba nzoba nkifise, ico yansavye ni gito kandi nimba arico cipfuzo c'umutima wiwe ngiye kugishitsa imbere y'uko agenda kugira azogende amahoro kandi anezerewe"

Narahagurutse niraba mu kiyo cari kimanitse ku ruhome, maze ngerageza gutwenga bigoranye mbona birakunze nubwo numva umenga ngize ibintu bitabaho. Natanguye kwimenyereza gutwenga, ntangura no gutwenga gitabura munwa ku buryo haheze umwanya, numva nabimenyeye nca ndagenda muri salon mbwira mukuru wanje nti: "Grand shiramwo ifilm itwenzana numva nshaka gutwenga"

Nza mbona arakangutswe aca arahindikira arandaba atangaye ati: "Uri sûre ko umeze neza ga man?"

Nca ndatwenga: "Hahaha caaane, ahubwo nshiriramwo reka kumbanira wana"

Namwicaye iruhande acashira kuri Canal+ Comédie, tuca turaba ifilm yariko iracako ku buryo nisanze ndiko ntwezwana n'akantu kose kabaye ataruko ndiko ndigirisha kandi ndavyiyumvamwo. Mukuru wanjye wewe ntiyatwenzwa na film ahubwo yatwenzwa na jewe. Buri uko ntweze nabona yansamariye aguma antwenga aca amfata ku rutugu film iheze ati: "Merci mon frère, sinzi ivyakubayeko ng'uhinduke, sinzi nimba wanyoye urumogi canke inzoga, ariko ndakubwire ko ndagukunda umeze ukwo, rero nimba arikintu cabigutumye, ico kintu kibandanye kuko ntaco kiriko kirakwicira uretse ico kiri kugukiriza."

Mukuru wanjye yaransezeye aja kuryama, nanje ngenda mu cumba nkomeza kuraba ca gicapo nsoma na ya majambo meza ya Aria gushika aho naciye mbona...

## 5

Naherutse ndiko ndaba rwa rupapuro nsoma na ya majambo gushika aho naciye mbona nikanguye bukeye nca menya ko ca gihe nahavuye nsinziriramwo.

Hari ku wagatandatu, uwo musu navyutse nkora nkukw'abandi benshi bakora, nambara impuzu z'ikarashishi, nanje nihereza ibarabara ndaduga umusozi gushika aho nasanze umurwi w'abahungu n'abakobwa ahantu hari utwatsi twiza bariko bagiriramwo imyimenyerezo, nanje ntabanje kubaza nca ndabajamwo. Mbandanyirizamwo gushika igihe baruhutse. Umwe yariko arabakoresha atubwira twicare tugize umuzingi munini, tuca turicara maze aca atangura kuvuga ati: "Shalom kandi kuri mwese ndetse na bashasha, ndabona harimwo amasura menshi mashasha ariko mwese ndabahaye ikaze, mwiyumve amahoro ntihagire uwumva akumiwe, nkaba nitwa Bienvenu. Rero kubatabizi, ngaha iyo duhejeje kugira sport misi yose, turicara tukaganira, tugahanurana, tugashigikirana, tugaterana intege muribi canke biriya bijanye n'ubuzima kuko turi ibiremwa bitikwije, twese turakeneraniye. Jewe nshobora kuba mfise ico ukeneye, nawe ufise ico nkeneye, ariko hatabaye ukuganira, usanga ngumanye ico ukeneye, nawe ukagumana ico nkeneye, hama muri ubwo buryo tukagumana ingorane zotorewe inyishu."

Je nakuze ntaha umwanya abantu, sinzi igituma numva ko atakeza k'abantu, ariko uwo musu numvise nezererewe



kubabamwo, nkomeza kubitegereza ingene batwenga, bitanaho, ntangura kwibaza nti: "None aba bantu ni bwoko ki?"

Wa muhungu yarabandanije ati: "Umuntu yoba afise ikintu yodusangiza arahawe ikaze"

Nabonye umukobwa yari yicaye iruhande yanje adugije ikiganza, bese baca bamuhanga amaso aca aravuga ati: "Shalom murakoze cane kumpa ijambo. Nitwa Huguette, ikintu nashaka kubasangiza ni ikintu maze imisi ndiko ndiga. Natahuye ko kw'isi atagihamana kibaho, ushobora guhura n'umuntu atagahunda mufitaniye ariko ukaza ubona murahuje, ndetse ukaza ubona akurutiye benshi mwamanye, ndetse atumye ubuzima bwawe buhinduka bwose. Akenshi turirengagiza abantu duhura nabo, ariko ntutuzi ko iruhande yo kubirengagiza tuba twirengagije n'ibintu vyinshi vyiza dukeneye baba batekeye muri bo. Rero jewe ntahura ko umuntu wese duhura aba ari rendez-vous iba yateguwe n'Imana kugira dufashanye gutera imbere, kuko atamfashije jewe ndamufasha, nivyo murakoze kunyumviriza..."

Bese baciye bakomera amashi rimwe, naje ndayakoma hama bahamagara uwundi yogira ico avuze numva novuga nca ndaduza ikiganza nti: "Haheze imisi itatu mpuye n'umukobwa..."

Nza numva bese batwengeye rimwe bamwe bavuga ngo: "Aho sha!!! iyi yoyo ni final"

Abandi ngo: "Wape wape..."

Nagumye ntwenga kuko nari namenyeye gutwenga. Haheze akanya basubiye guhora nanje nca ndabandanya nti: "Nari mw'ibarabara ntashe mw'i quartier ncamwo ntashe..."

Nababwiye inkuru yose y'ivyari bimaze imisi bimbako na Aria, ntangazwa n'uko nahejeje bose bacereje, ndavye mbona abakobwa batanguye kurira, nza numva wa muhungu aravuze ati: "Vya kweli, iyi nkuru ni iy'ukuri?"

Twaciye duhaguruka, mbona benshi baza kundamutsa banyitayeho banyaka numéro gushika turatandukana aho nagiye kumenya ko Huguette twataha mw'i quartier imwe, tuca turatahana bukebuke tugenda turaganira kugeza n'aho twaciye no kuri rwa rupangu Aria yabako, ndarumwereka, tuca turashika aho dutandukanira turasezerana.

Nashitse muhira, nsubira kwiyumvira ku majambo Huguette yari yavuze nti: "Nubwo nizera bike, reka mfate ko ivyo yavuze arivyo, n'ukuvuga ko hariho impamvu nziza yatumye numva arya majambo muri kino gihe ngezemwo, kandi guhura kwanje na Aria yari rendez-vous, nimba arivyo igamije iki?"

Naciye nshira muri gahunda kuza kuja kuraba Aria kumugoroba, atakwihagararako nari numva ndamukumbuye, nari numva nshaka kumubwira ko icipfuzo c'umutima wiwe ngiye kugishitsa. Nari numva nshaka ko anyigisha ikindi cigwa, icigwa ca gatatu. Natoye ka gacarnet kanje ntangura kwandikamwo ivyigwa yari amaze kunyigisha. Icambere yambwiye ubwenge icarico, icakabiri anyigisha gutwenga, ica gatatu ni co nari niteze kwumva aho turi buhuriye ku mugoroba.

Amasaha nk'uko arivyo vyayo, anyaruka iyo ucerewe agateba iyo urindiriye. Uwo musu yarikweze ariko isaha cumi n'imwe zigeze, ntangura kwitegura mpejeje, ndagenda. Nkiriko ndagenda, numvise umuntu ampamagaye, nca ndahindukira ndavye mbona ni Huguette, nca ndahagarara ndamuramutsa nza numva ambwiye ati: "Tuje kwa Aria"

Ntangaye nca mvuga nti: "Niyo nsanzwe ngiye"

"Wao! Abagabo barara kubiri bakarota kumwe"

"Sauf we ko utari we"

"Ni umugani ukora kuri bese"

"Vyoshoboka ntavyo nzi"

Twajanye na Huguette gushika kwa Aria dusanga harugaye ntanumwe ariho, numva ndababaye bivanze no guhangayika sinzi ukuntu naravye hasi nca mbona...

## 6

Naravye hasi nca mbona igice c'urupapuro giseruka hanze musi y'umwango, nca ndunama ndarutora, mbona inyandiko si iya Aria, nca ndasoma. Rwagira ngo: "Aria yaremvyeye twamujanyeye ku bitaro"

Numvise umutima utarutse uhakwa kumvamwo, urupapuro narurekuriye hasi, ngenda ndiruka, Huguette asigara arampamagara ariko ntakindi cari kindi mu mutwe uretse gusanga Aria mubitaro. Natanguye kwiyumvira nti: "Nkubu nosanga vyamaze kurangira? Nkubu nosanga yamaze kugenda? None kuberiki ntashaka kuvyakira kandi ndabizi ko aribitegezwa gushika isaha n'isaha?"

Naragiye no kubitaro nshika mbaza aho Aria ari barahandangira bambwira ko ari muri coma nca ndinjira ndamukubise amaso numva intege zirancitse binanira kwihangana numva amosozi arakorotse. Nicaye kugatebe kari impande y'igitanda, maze ndamuhanga amaso, ndaba ingene yari yuzuye ibintu bimucumetsweko umubiri wose, yarahumiriye umubiri ugwana no guhema. Nagiye mbona Huguette yinjiranye n'uwundi mukobwa bashika banyicara iruhande, nza numva wa mukobwa ambajije ati: "Ni wewe Igor?"

Nanje ndishura nti: "Ego"

"Umenga yarabizi k'uhava uza, akira aka gacarnet. Yari yatubwiye tukaguhe niwaza"

Naragatoye haheze akanya baragenda, nsigara jenyene na Aria, maze nkura ka ga carnet mu mufuko, ndaheza ntangura gusoma. Yasa n'inkuru Aria yanditse maze ntangura gusoma yagira iti:

*"Naravutse impundu ziravuzwa, mama abwirwa ngo simba imanga Imana icane ariko yasimvye imwe, iyiri imbere imunanira gusimba, maze ansinga murino si, isi imurikira bamwe ikijimira abandi, isi atampuhwe ata rukundo ata mbabazi, isi itanga irobanuye ku butoni. Papa yahoze ambwira ko Mama ataho yagiye ko ampora hafi iteka ankingira akandinda, naravyizera kandi vyarankomeza nkabandanya n'igihe abaganga bashishikara kumbwira kw'atagihe nsigaje, maze nanje nkabatangaza mbandanya kubaho bitoroshe. Hari igihe nibaza ko ubuzima bwanje ari ikigeragezo ariko nkibaza nti, kw'ijambo ry'Imana rivuga ngo "Ntacabagerageje atarico kwihanganira," kuki je ntahawe inkomezi zo kucihanganira?"*

*Kuberiki ndaba abandi bakobwa turi mu rugero rumwe batambuka bemye, baryohererwa ubukumi bwabo, mu gihe je mba numva umubiri uriko uramvako buri museconda, nanje ngwana no kuwugumya? Ubu aho bigeze, nta nkomezi ngifise zo kwiharagararako, meze nka buji igira izime. Ndazi ni benshi bafitiye amatsiko yo kumenya uko wiyumva ugira usubize ubuzima Umuremyi, ariko uno musu mpisemwo kubandikira ndabibire akabanga.*

*Si icoroshe namba, kuko buri gihe uryama utazi ko uri buvyuke, ukavyuka utazi ko riri burenge. Umwanya uriruka ukumva wowubaza ico wihutira, ariko inyishu ukayihira, kuko iba iri imbere y'amaso yawe. Uba ubona inzira ishitse ku maherezo yayo. Usubiza amaso inyuma, akakwereka ivyo vyose wakoze uteri ukwiye gukora, akakwereka kandi n'ibindi vyinshi warukwiye gukora utakoze, indoto wanse gukurikira kubera gutinya canke kubera ubunembwe, abo wababajye utasavye imbabazi, uwo wakunze vy'ukuri utigeze uvyereka canke ngo ubimubwire bigishoboka... Uba wumva wotanga ivyo ufise vyose nk'ikiguzi kigukundira gusubiza imyaka inyuma, ugasubira ukabaho ugakosora amakosa wakoze. Kuko uba wumva iy'aba vyokunze, wobayeho nyakubaho, ukanezererwa ubuzima kuko ni ingabire irusha agaciro vyose. Ikibabajye n'uko uyimenya iyo iriko iraguca mu myanya y'intoki.*

*Ubu maze imyaka cumi n'umunani ngwana n'umubiri, ubu ndabizi kw'uru rugamba ntagishoboye kururongora, ndabizi ko nabaye intwari canke intwarikazi nimba kivugika kuko nzotsindwa rimwe ariko nabanje gutsinda incuro zidaharurika mw'iyi myaka yose. Ndavyutse mu gitondo ntoye aka gacarnet, nakivye Igor kera ndazi nawe nyene ntavyo yibuka kuko umusi wambere naramubajije kw'ataco ataye mbona ntasobanukiwe, kuko nkuko namye ndabimubwira ubwenge s'ikirenga. Mpisemwo kukandikamwo ibibera indani muri jewe, iri n'ikete ry'urukundo numvise nokwandikira isi imbere y'uko ngenda, ariko kandi imbere y'uko ngenda harico numva nkeneye kugenda nkoze.*

*Sinzi igituma ariko ndavyumva, ariko kandi igituma nemezwa neza kw'arico naremewe, kw'ariyo mpamvu yo kubaho kwanje.*

*Namye ndamubona kuva kera nubwo we atambona, buri uko twahura numva ijwi rivugira muri jewe rimbwira ko ankeneye kandi nanje ariwe nkeneye. Ukwo imyaka yagenda niko nagenda nsobanukirwa ico abuze, rero ubu navyukanye ihangiro ryo ku musanga maze nkakora ico naremewe imbere yo kugenda, uwo nawe si uwundi ni...*

# 7

*Uwo nawe s'uwundi ni... Oya si Igor haha, yonywera hehe ko jewe ndi ubutare buzimvye budatorwa aho ariho hose. Vyantwaye igihe kirekire kugira ndabitahure. Ijoro rimwe imbere yo kuryama namanje nshwanira Imana igituma ari jewe vyabayeko mu bantu bari kw'isi bose. Ndabizi ko kw'isi ntar'umwe arikw'aca mu bibazo biruhishije, ariko nakwibaza igituma vyabaye ngombwa ko nanje mba muri bo, mu gishingo co kuba muri barya bandi benshi baguwe neza.*

*Iryo joro nasinziriye mbabaye, ariko naciye ngira indoto nziza zatumye mvyuka ndi mushasha, zatumye mvyuka ndabira isi n'ubuzima mu mfuruka nshasha, zatumye mvyuka nkeye, nezerewe ntwenga gusumba abafise ico ntafise, zatumye duhura na Igor ndamurusha ubwenge kandi yari incabwenge mw'ishure, ariko nanje ndamwereka ko ntari incabwenge ariko ko nd'umunyabwenge, kuko nari namenye ukuri, ukuri kw'ubuzima.*

*Narose mbona icumba canje kimurikirwa n'umuco udasanzwe, ku buryo wuzuye icumba cose gisigara kiyagayaga mu buryo buteye ubwoba, aho vyananiye kwugurura amaso kuko umuco warasa cane ntabona iyo uva ariko ukabuza amaso yanje kubona. Naragize ubwoba ntangura kwibaza ko nshobora kuba napfuye, ntakiri mw'isi ahubwo ko nashitse mw'ijuru. Nkiriko ndahinda agashitsi, numvise ijwi rivuga risamirana, vyananiye gutandukanya ko ari ry'umugabo canke ry'umugore. Ndibuka amajambo ryavuze rimwe ku rindi nk'uwuriko arayumva kandi*



*mu matwi yanje ubu nyene. Ryagize riti: "Kuki uronderera hanze mu gihe utekeye urufunguruzo rwugurura vyose muri wewe?"*

*Naciye nzanzamuka ndava mw'itiro, nsanga bwakeye ndavye musu mbona Papa yamaze kugenda, nca ndicara ku gitanda, nsubiza ubwenge ku bintu vyari bihejeje kumbako. Nagerageje gutahura iryo jambo, ndariburira inyishu, ariko kandi numva ndanezerewe, haca hanzamwo icyumviro co kuja kuraba uwundi mutama w'umu-islamu yakunda kwicara mw'ibarabara hirya harabana no muhira. Yakunda kuba ahicaye ariko yinywera ikawa iyo atariko akina urubugu nabandi. Naje narakunda kuja kumwicara iruhande akaba aranterera inkuru.*

*Yari umutama nibaza kw'atari umuntu, kuko yavugaga ibintu birengeye ubwenge bw'abantu. Kuva nkiri muto nama nja kumuraba. Ndibuka igihe kimwe yankoze mu ruhanga, mbona arahumirije aca avugaga ikirimi ntumva, ariko aca akurikiza ati: "Ufise ubutunzi ab'isi badafise" Ico igihe namubajije insobanuro y'ivyo ahatse kuvugaga, aca ambwira ko nzobimenya nkuze.*

*Uwo musu nagiye kumuraba nshaka ndamwicara iruhande ntaragira ico mvugaga nza numva ambariye ati:*

*"Ubuzima bwawe bumeze nk'isi yawe wisangije nawe ukaba nk'imana yayo. Utekeye muri wewe ubushobozi bwo kuyirema ukwo ushaka, igihambaye si igihe umara muri ubu buzima*

*ariko ni ingene uhitamwo kububamwo no kuburema biciye mu kungene ububona. Nimba ububona nk'ikibazo kuri wewe, ya si yawe uba uhejeje kuyiremamwo ibibazo gusa, ariko niwabubona nk'inyishu, isi yawe izonengesera inyishu kuburyo uzobona aba kurusha ibintu bakurondera kuko bazobona inyishu muri wewe. Igikomeye s'ico ubonesha amaso yawe ariko n'ico ubonesha ubwenge bwawe iyo uravye isi. Ico naco uragihitamwo."*

*Narahagurutse ndamuhobera nza numva ambwiye ati: "Ndekura wa gakobwa we, ntubona ko nshaje, ushaka umvune imbavu?"*

*Naramurekuye, ngiye nza numva asubiyemwo ya majambo yambwira nkiri muto ngo: "Wibuke ko ufise ubutunzi ab'isi badafise"*

*Kuva uwo musu numvise mpindutse, numvise ngize indoto yanje nshasha, indoto yo kurema isi yanje, indoto yo kutava kw'isi ntabaye inyishu kuri n'imiburiburi umuntu umwe, niho naca ndamubona arenganye. Naramwitegereje mbona yijiriwe, mbona umenga ntabuzima afise, vyarantangaje ukuntu umuntu ashobora kuba afise abavyeyi, abavukanyi, aba ahantu heza, yiga amashure meza, abayeho neza ariko umuravye ukabona umenga nta buzima afise. Kuva uwo musu namugize umwitwarariko, maze ntangura kumwigako cane ndetse ndamumenyako vyinshi.*

*Kimwe muri vyinshi naje kumumenyako ari naco gituma kuva ndakimenye ntashaka ko riranga ntamubonye, nemera nkanyonga ikinga ngwaye kugira nagusa ndamubone, gituma numva atakibazo na kimwe mfise iyo turi kumwe, gituma numva*

*nkomeye ari iruhande rwanje naho noba ndi muri coma, nibaza ko ukubaho kwiwe kwoba kumpagije, mu bisanzwe nibaza ko n'igihe nzoba namaze kugenda, kumenya gusa kw'azoba ariho kandi afise ubuzima bizotuma numva ko ndiho, kuko nzoba ndiho muri we. Ico gituma naco s'ikindi ni...*

## 8

*Ico gituma namenye ni uko namukunze ntitaye kuba dutandukanye kandi kuba ntazoshobora kumarana igihe nawe, ndamukunda kuburyo mba numva noguma ndamucapa, numva noguma ndamwumva bamuvuga, numva noguma ndamubona. Simbabaye kubona ngiye kugenda, ariko ndanezerewe kubona nzi ko ngiye kugenda menye gukunda icarico n'uko bimera. Gukunda biraryoshe, gukunda bigaragaza ko uri muzima kuko abapfuye ntibakunda. Sindamukunda kugira ankunde, ariko ndamukunda kuko ari kiremwa gikeneye kandi kibereye gukundwa, ivyo birampagije.*

*Nipfuza kugenda ntereye umunezero mu buzima bwiwe, nipfuza kugenda ngize ico mpinduye mu buzima bwiwe, nipfuza kugenda mbonye agatwengo kiwe. Narabisavye Imana, kandi ndizera ko izokora igitangaza kingana no kunkiza. Kuvuga menshi sikwo kuyamara, nizera ko azosoma inkuru yanje ikamubera icigwa canyuma nashaka kugenda ndamuhaye."*

Nahejeje gusoma vyose numva nabaye uwundi muntu, natanguye kwibaza ko kumbure ndi mu nzuzi, amosozi yagumye ankorokana gushika aho nagiye numva umuntu ankoze ku rutugu, mpindukiye nsanga ni se wa Aria aca mbwira ati: "Wakoze kumuguma iruhande Ijoro ryose ariko taha uruhuke." Nagerageje kwanka kuko nari numva ntashaka kuva iruhande ya Aria, ariko angobera gutaha maze nca ndataha. Niho namenye ko burya bwose naraye nicaye nsoma inkuru ya Aria.

Nashitse muhira ndangurura mu cumba, nsubira kwibaza ca kibazo nakunda kwibaza nti: "Ubuzima niki koko? Kuki vyabaye ngombwa ko mpura na Aria? Kuki nanje numva umenga Aria yamaze kubaigice c'ubuzima bwanje? Kuki twahuye dutevye? Kuko numva umenga ndiko mperana na Aria? Kuki numva umenga nsinzoshobora kubaho adahari?"

Nakomeje kwibaza gushika aho nasubiye kubona nikanguye ku mugoroba numva inzara irenze, nca ndagenda gufungura nubwo nari numva atakanovera bifise, ariko nari ndabizi ko ngomba gufungura kugira mbeho atari kubwanje ariko kubwa Aria basi. Uwo mugoroba nasubiye ku bitaro nshitseyo ntarinjira ntangazwa no kubona abantu benshi bicaye muri coridoro imbere y'icumba Aria yararimwo nca nibwira ko ntakabuza yamaze kugenda. Isorori nari mfise nari ngemuyemwo yarancitse igwa hasi, kubw'amahirwe igwa mutwatsi ntivyaseseka, nanje nicara ku ruhande, ibiganza ndabishira mu maso, ndumva neza ko isi ihagaritse kuzunguruka, ndumva umenga mu mutwe habaye ubwirakabiri.

Numvise ijwi rya se wa Aria, sinzi igihe yanyicariye iruhande, namwumvise yidoga ati: "None ubu nzosigara nkora nkoreriki? K'uwampa inkomezi zo gukora agiye?" Narunamutse ndamuraba nti: "Koko yamaze kugenda?"

"Bisa navyo kuko abaganga baguma bavuga ko ibimenyetso vy'ubuzima bitera bimanuka, umwanya n'umwanya birahagarara"

Nahagurutse nyaruka menya ko burya ataragenda, nshitse muri corridor ndavye neza mbona ba bantu nari nabonye ni bamwe twigera guhurira muri sport ca gihe, nca ndabaramutsa nabo bashishikara kunkomeza, ariko nca ndabacako ndinjira, nsubira nicara hahandi, ntangura kumuvugisha n'ubwo atanyumva nti:

"AriaAllegra ndakwingize vyuka Patiri ari ngaha yaje kukubatiza ayandi mazina, yaje kukubwira ko ivyigwa vyose wamuhaye yabitahuye cane, ndaje kukubwira ko ndincabwenge nawe ukaba umunyabwenge, ndaje kukubwira k'uri ubutare buzimye budatorwa ahariho hose, ndaje kukubwira k'uri intwari mu rugamba, wanesheje vyinshi, unesha n'ukwihagararako kwanje, nukuri ndaje kukubwira ko nanje ndagukunda..."

Nagiye numva ikiganza kinkoze ku mutwe, nca ndunamuka ndavye mbona amaso ya Aria ariko atemba amosozi, haheze akanya nza mbona arakanuye aca yerekeza ukubuko kwiwe ku munwa, amanura gato icamufasha guhema cari gifutse umunwa, nza numva aratwenze mu kajwi k'umugwayi nyene, aca ambwira ati: "Humura si kamere yanje kugenda ntasezeye na cane cane umunyeshure wanje"

Aria yari mwiza atwenze kuburyo ndamuravye numvise nomuhobera ariko ngira impungenge ko nohava ndamubabaza, nca mpitamwo gufata ca kiganza ciwe ntangura kugisomagura ntwenga, amosozi y'umunezero nayo anshoka ku matama. Aria

yambwiye mwijwi rito ati: "Urazi ko nariko ndakurota? Amajambo wambwiye mu ndoto yar'aryoshe kwumva kuburyo ntashaka kwikangura, kuko natinya guhumura amaso hama ngo ndakubure."

Jewe nca ndatwenga bukebuke nti: "Ntiwariko urarota ahubwo wariko uranyumva kuko nariko mvugira mu matwi yawe"

"Ushaka kumbwira ko ariwe uhejeje umbwira..."

"...ko ndagukunda" ngirako mperaheza.

Aca ararira gose, nanje ngira ubwoba aca ambwira asevura ati:

"Ntugire ngo ndababaye, ahubwo ndaryohewe birenze ukwo nigeze"

Haciye hinjira umuganga, atangazwa no gusanga tuvugana ati: "N'igitangaza pe! Wikanguye?"

Naciye nsohoka, nsaga inkuru nziza kubari bari aho bose kuburyo natangajwe n'ukuntu banezerewe, bagahoberana nanje nca mpobera se wa Aria kuko niwe yari ahagaze wenyene.

Aria yahavuye asaba uruhusha rwo gutaha bararumuha iryo joro arataha, ariko ntatuguvu yarafise kuko kuva ico gihe ntiyasubiye kuva munzu. Umusi umwe nagiye kumuraba nsanga...

## 9

Umusi umwe nagiye kumuraba nsanga yicaye hamwe kw'irembo namucako ku ncuro yambere dutangura kuvugana, nanje nca ndamwicara iruhande. Tuca tuba turaganira nk'uko nari numva mfise ibibazo vyinshi vyo kumubaza, nca ndamubaza nti: "Umusi wambere duhura wambajije ko harico nataye harya warugamije iki vyukuri?"

"Nashaka kuronka ivyo tuvugana"

"Hmmm sindavyibaza..."

"Hhhh wari wataye icarnet ntiwabimenya nako nari nayikwivye irya wasomye igihe nari nsinziriye"

Namubajije ikindi kibazo nti: "Ku musi ugira kabiri twaravuganye oya nako ntitwavuganye warambaza hama ukiyishura ariko igitangaje n'uko wiyishura nkuwuriko ansoma mu vyiyumviro, mbwira urigiki wewe?"

Aria aca aratwenga cane, aca anyishura mu bitebu ati: "Akavajuru. Jewe sindi umuntu w'inyama n'amaraso nka mwebwe"

Naciye ntwenga buhorobuhoro nti: "Ntibitwengeje kuko jewe ndi seriye."

"Nanje ndi seriyeze, erega sindenza aha, kandi merci gutwenga"

"De rien ariko mbwiza ukuri"

"Ntiwibaze ngo hari ubushobozi budasanze mfise, ariko nawe hari ikibazo wobaza umuntu, biteye n'ukuntu umuzi neza, ukagereranya canke ukamenya inyishu aza kuguha, nikwo nanje nabigenjeje, ntakidasanzwe"

Nasubiye kumubaza nti: "Kuberiki umeze uko umeze?"



"Meze gute kwanza?"

"Uburyo ubonamwo ibintu canke utwaramwo ibintu kuratandukanye n'ukumenyerewe"

"Ubuzima ni ishure, ariko umuntu wese atahura ivyashizeko umutima. Ni nka kurya wewe washira umutima ku vyo mw'ishure akaba arivyo utahura cane, umudandaza naho atoba yaraciye mw'ishure ngo yige ibijanye n'ubudandaji, ariko akuze abishizeko umutima nivyo usanga atahura cane mbere kurusha n'abagiye kuvyigira, kuko uwagiye kuvyiga kw'ishure, umutima wiwe ubanza kuja kubijanye n'amanota, kandi kw'ishure si kuri terrain. Mu burere bwose bw'ubuzima, utahura cane ico ushizeko umutima, ushize umutima ku muziki niwo utahura cane. Jewe nakuze nkunda kwiyumvira ubuzima bwanje na jewe ubwanje, kuburyo nari numva nshaka kumenya insiguro nobuha kuko nabona umenga ntayo. Ndakunda kwumviriza, ndakunda kuraba, ndakunda kwiyumvira, kandi ndazi ko nawe we ivyo urabikunda, ariko itandukaniro ryanje nawe n'uko wewe bisa n'ibigarukira aho. Jewe hirya yo gukunda kwumviriza nshira umutima kuvyo numvise, iruhande yo kuraba menya ko igikomeye atar'ico waravye ariko ar'ico wabonye, hama igikomeye s'ico wiyumviye ariko n'ico watahuye kuko ivyo vyose arivyo bigenga amahitamwo uagenda urafata.

Je nahisemwo kwiga ubuzima ubwabwo, mugihe namwe mwari kw'ishure, mu gihe naba mbabaye, namenye ko hari ibintu mu buzima umuntu adashobora guhindura, ariko ko igihe cose

hama hariho ico umuntu yama ashoboye guhindura, ingene ubona ibintu n'ingene uvyitwaramwo.

Ubuzima ni buto cane, aha ntiwibaze ngo nije ndi mu kugenda ariko nawe ntagihe usigaje kirekire. Sindiko ndagutera ubwoba ariko fata kuva uvutse gushika uno musu, usanga umenga wavutse ejo uko niko uzoza wibona ushaje. Rero uko buba buto, namenye ko ntakwiye kubupfusha ubusa, menya ko igituma umuntu aruta abandi s'ibintu aba abarusha, ariko ni igihe ahitamwo ikiruta ikindi, naho nasanze atakiruta ikindi nk'ubuzima ari naco gituma aribwo nshirako umutima, nkabutahura ningoga kurusha benshi.

Rero ntiwibaze ko hari ikindi kintu ndi ni nk'uko nawe twogenda muri Math, Physique, Chimie nosanga uri umuhinga, ariko utwo ni utudetail duto cane tw'ubuzima. Hahaha icigwa cacu kigarukire aha ndasavye"

Aria yar'atangaje, namuruta umwaka umwe gusa, nkamurusha amashuri yose nize, ariko ivyiyumviro vyawe vyari bitekeye ubwenge bwinshi kuburyo nacye ndamubwira nti: "Hari kintu nshaka ko uzokora imbere yo kugenda"

"Oya Igor. Mission yanje ndiko ndayishikana ku musozo, burya igihe kiregereje hama bangerere ivyo nakoze muri ubu buzima, hama ndonke impembo nkwiye"

"Oya uracafise vyinshi vyo gukora"

"Nk'akarorero?"

"Kuberiki ari jewe ndiko ndumva ibi mu bantu bese bari kw'isi?"

"Sinzi, ngirango niwe vyagenewe canke usanga niwe uzoja kubisangiza abandi namaze kugenda, erega umunyeshuri

mwiza ni uwubandanya gushika nawe abaye umwigisha mwiza. Rero vyari bikwiye ko ngenda hama nkazokurungikira ubushobozi Hhhh. Mbaye Yesu noneho!!!"

Nca ndamubwira nti: "Oya, je ndazi k'uzokora ibirengeye ivyo imbere y'uko ugenda"

"Ushaka dupinge none?"

"Ico nzi co jewe sintindwa"

"Nije uzi atsindwa rero?"

"Oya, we gusa reka dupingire iki?"

"Ntitwirigwa turaharira, ninakora ibirengeye ibi, uzonsabe ico ushaka imbere y'uko ngenda."

Uwo musu natandukanye na Aria, ngenda nsubiramwo ivyo yambwiye vyose kuburyo naje nari numva nahindutse, nari nsigaye mvuga nkawe, niyumvira nkawe, nkiriko ndagenda hanjemwo icyumviro naco sikindi ni...

# 10

Iciyumviro canjemwo nico natanguye gushira mu ngiro, maze igihe kiregera vyose vyateguwe. Ukwo imisi yagenda niko na Aria vyatera vyanka gushika aho atari agifise utuguvu two guhaguruka, yarasigaye agendera mu gakinga. Vyarancumita mu mutima buri uko namuraba, nkamenya yuko ariko atera agenda, ariko nkuko yari yaranyigishije ati, "iyo udashoboye guhindura ibintu, hindura uko ubibona." Nari numva ntashaka kwemerera ico cyumviro c'uko ngiye kumutakaza, ariko ndagisubiriza n'iciyumviro c'ico ariko aransigarana imbere yuko agenda. Ahari ubwoba n'akabonge haja ishimwe ridasanze ry'ico Imana iriko irakora mu buzima bwanje ibicishije kuri Aria.

Igihe carageze tujana na Huguette kw'isoko, hama ducagura impuzu nziza za Aria hama turazimushira, Huguette aramutegura neza, aramwambika, aramusokozwa, anamusiga mu maso bigezweho kuburyo nawe nyene yiravye mu cirori akisamarira.

Twamusunitse ku gakinga, duhamagara taxi, tuca turagenda gushika ku nyubako imwe yari yateguwe, maze turamwinjiza duciye mu muryango umwe, maze duserukira ahanu hari haka itara rimurika Aria wenyene ku gakinga yari yicayeko. Nca nzana caméra ndamushira imbere nca ndamwongorera nti: "Mu misegonda cumi caméra iratangura gufata amasanamu, rero nshaka ko uvuga inkuru y'ubuzima bwawe n'ivyigwa wize mu buzima bwawe bwose, isi irashaka kuvyumva"

Aria ntiyatahura na kimwe yaguma atwenga nca ndamubwira nti: "Shiiiiihhh fata ubuseriye"

Naciye ngenda hirya ku ruhande maze Aria atangura kuvuga, humvikana ijwi ryiwe wenyene.

"Ubuzima ni iki? Nico kibazo buri muntu wese muzima yibaza buri musi ntaronkere inyishu. Bamwe bavuga ngo bizi Imana, abandi ngo ntibindaba, ariko ni bake bahitamwo kwumviriza ijwi ryongerera mu mutima, bagatahura ibirengeye ivyo ryavuze. Nitwa Aria mfise imyaka 18..."

Aria yabandanije avuga inkuru y'ubuzima bwiwe. Yari yuzuye ibigumbagumba vyinshi kuburyo naje aho narindi vyanse ko nifata nkisanga ndiko ndarira, aho yaheraheje avuga ngo:

"...uriko ubaho ubuzima nk'ubu bw'iwanje, womenga ntaburenganzira wokwiha bwo kurota kuko atavyizigiro biba bihari vyo gushikira indoto zawe, ariko nahakanye kuba imbohe y'umwanya, maze mpitamwo kuba intwarikazi ya jewe nyene ubwanje, mpeza ngira indoto, indoto nyinshi cane kuburyo nibaza ko ndusha indoto benshi bagisigaje igihe hano kw'isi. Ikiryoshe muri vyose ngenda ndacamwo ni uku kuntu mvyuka ntazi ko rirenga, nkaryama ntazi ko buca, bituma mbaho nya kubaho, buri musegonda ni uw'agaciro, ntaco mba nipfuza gutakaza. Nkoresha amahirwe yose ndonse, nkatanga ico mfise nkagisangira n'abandi.

Ubuzima ni urugendo ugenda aho uciye hose uhasiga inkuru, indoto imwe muri nyinshi nagize niyo gusiga inkuru nzima ku musozi, n'iyo kutagenda nkazimangana mu mitima yabose, n'iyo kutagenda bavuma, n'iyo kugenda n'imiburiburi umuntu umwe mu miliyaridi zitandatu z'abantu baba kw'ino si, ndamusize yishimiye ukubaho kwanje. Kuri jewe, niyo nita intsinzi mu buzima, ari naco gituma nobwira uwo wese azoraba iyi vidéo nti, ntukwiye kubaho ukwarikwo kwose kuko nturi uwariwe wese. Tanga ico ufise ahugeze hose. Ufise amafaranga fasha uwushonje, ufise urukundo? Hari abazingamitswe no kurubura. Ufise umwanya? Hari injojo z'abantu bipfuza umuntu abicara iruhande gusa. Ufise ivyiyumviro? Ufise impanuro?

Sinzi ico ufise, ariko baho buri musu nk'aho ar'uwanyuma, hanyuma uharanire gusangiza abandi ico ufise, kuko hari impamvu Imana yakigushizemwo kandi kuzogenda utagitanze ni icaha utazokwibabarira n'inyuma y'ubu buzima. Ahanje ndagiye ndabizi ko ngiye nk'intwari ntarinze kubibarirwa kuko igikuru s'ico bambwira ariko n'ico umutima wanje umbwira, musigare mu mahoro menshi no mu rukundo rwinshi yari *AriaAllegra*"

Aria yahejeje kuvuga aca aguma ahoze, jewe aho nari ndi amosozi vyaranse kw'atamba aja munda, ahubwo nari numva umenga munda huzuye haranengesera, maze atangura guseseka atamba ku matama.

Haciye haka amatara muri salle kuburyo Aria yatangajwe no kwisanga yari yicaye imbere y'isinzi ry'abantu bamuteze amatwi mu gacerere mugihe we yibaza kw'ariko avugira

imbere ya camera gusa. Vyamunaniye kwihangana aca arandaba, nca ndiruka ndamusanga aho ari maze ndamuhobera cane, amashi aba imvura, abantu benshi baza kumushimira barira, ndabamesha ko nabiteguranye n'ababandi twahurira muri sport.

Aria intwari yanje, igihe carageze iryavuzwe rirataha, ataha abaye icamamare. Ndibuka ndi mu modoka, ngiye kwurira indege nja mu Burusiya, aho naca ku mabarabara hose nabona ivyapa n'ibicapo vyuzuye ahantu hose vyanditseko biti: "Aria warakoze kubaho"

Yasize ambujije kumukurikiza amarira, simbabaye kubona yaragiye kuko iyo ndamwiyumviye, sindamwiyumvira nk'ico natakaje kuko mu mutima wanjye ni muzima. N'aho mba ndi mu rwamo rwinshi, ndashobora kwumva ijwi ryiwe rimbwira ibindi vyigwa vyinshi. Uno musu simpengeshanya kuvuga ko ndi incabwenge nkogera nkaba umunyabwenge vyose kubwa Aria. Ikibiruta ndi muzima mfise ubuzima, kandi ndanezerewe kuko mfise umutahe utagira ikiguzi...

**IHEREZO**

## **Akajambo kanyuma**

Iyi nkuru yacu ni ngaha igarukiye. Ndabashimire cane ku mwanya wanyu w'agaciro mwafashe mugasoma iyi nkuru, mwakoze cane kuyikurikirana. Nizera ko hari aho yabakuye n'aho yabashikanye. Jewe ku giti canje, ndaryohewe kuba mfise ico ndiko ndatanga imbere yo kugenda, nawe ukwiye kwibaza ico uriko uratanga imbere yo kugenda. Bishitse ukabura na kimwe, noguhanura kwigora ugafata akanya kanaka haruhande y'imirimo urimwo, hama ucihigemwo mpaka ukironse kugira nawe ntuze upfushe ubusa uyu mutahe utagira ikiguzi witwa "**Ubuzima**." Hezagirwa!